

# Tumults, sollevaziuns e dretgiras nauschas

■ En il Grischun èn da distinguer dus tips da tumults: las veglias sollevaziuns da las bandieras dad ina vart, conflicts e revolts da tempra confessional, politic-economica u culturala da l'otra.

## 1. Las veglias sollevaziuns da las bandieras

Quests uschenunads fendlilupfs grischuns eran arrotschaments da rebelliun spontans suandads per ordinari dad ina dretgira nauscha. A quel gener da tumults han appartegnì per exempel las revolts e las dretgiras nauschas cunter l'avat Theodul Schlegel a Cuira (1529), cunter ils pensiunaris franzos a Cuira (1542) ed a Zuoz (1565); Guerra da charnpiertg e cunter Johann von Planta (1572) sco era las dretgiras nauschas cunter ils aderents da las partidas Austria-Spagna e Frantscha-Vaniescha (1607 e 1618–20). A quest gener da tumults pon ins attribuir era l'Affar Massner a Cuira dal 1712 e l'Affar Marnia a Scuol/Sent dal 1735.

### Bandiera

Emprest dal talian *bandiera*. Per la bandiera da guerra era il pled fendli u fengli pli derasà en Surselva, per quella da baselgia il pled cafanun (sursilvan) u cunfanung (surmiran). Per clamar las truppas sut las armas u convocar a la dretgira nauscha schev'ins «auzar/manar la(s) bandiera(s)». Ina bandiera respectivamain in fendli/fengli correspundeva ad ina cumpagnia u truppa che marschava sut la medema bandiera, quai vul dir sut quella dal cumin. Las bandieras da cumin eran las unitads militaradas da la Republica; ellas furmavan sco talas, suenter l'auzada da la bandiera, las communidades da guerra che remplazzavan (de iure) la tschentada da cumin, exequind la dretgira militarada dal lieu (dretg positiv) sco era la dretgira da falliment visavi il stadi (dretg d'isanza). Il bandierel, accumpagnà d'ina guardia d'onur u da defensiun, purtava la bandiera. Las Lias han gi bandieras il pli tard dapi il 1524. Bandieras èn generalmain simbols che represchentan in collectiv. La restricziun da la suveranità dals cumins e la fin da las Lias en il 19avel tschientaner han diminuì l'impurtanza da las bandieras da cumin ch'han pers lur muntada militarada en favur da bandieras d'armada respectivamain da la bandiera grischuna e svizra. Il svilup da las societads da chant e da musica, da las uniuns da

tiradurs e.a. han effectua en la segunda mesadad dal 19avel tschientaner ina renaschientscha da las bandieras.

Adolf Collenberg

### Bandierel

Uffizi da gronda reputaziun en ils cumins ed en las Lias, istoricamain era banaher/panaher, banameister, fendri, portafengli, portabandiera. Il cumin da Tavau aveva il privilegi da metter il bandierel da la Lia da las Diesch Dretgiras. La seleziun, l'elecziun e la saramentaziun dals bandierels sco represchentan dal cumin e da sia suveranità politica e militarada eran generalmain acts da grond'impurtanza politica e consequentamain fitg ritualisads. Il modus d'elecziun variava fermamain d'in cumin a l'auter. En cumins che tschernivan il bandierel per vita duranta han existì entiras dinastias da bandierels (per exempel en Lumnezia).

Adolf Collenberg

### Sollevaziuns

En cas da delicts commess cunter il stadi applitgavan las Trais Lias savens il dretg da guerra. Ins sollevava la bandiera da las dretgiras autas. Ils umens marschavan armads al lieu da la dretgira nauscha, nua ch'els restavan fin che la sentenza era exequida. Ils chapitanis da quellas cumpagnias furmavan, ensemen cun ils mess civils, il cussegl da guerra che sa radunava al lieu da dretgira. Sco dieta aveva quest cussegl era il dretg da legislaziun. Las cumpagnias registravan il pli separadamain tenor Lias e dretgiras autas. La sollevaziun dals 4 da schaner 1814 è stada la davosa pratitgada a la moda veglia. Sollevaziuns sortivan qua e là era da tumults. Adolf Collenberg

### Radunanza extraordinaria da las Trais Lias

Ils cumins u la Dieta da las Trais Lias pudevan suspendir ils chaus-lia en uffizi, il Congress grond u pitschen e convocar ina radunanza extraordinaria da las Trais Lias. Ils cumins tschernivan ed instruivan a quel scopo novs mess (25 per dretgira, en total 650) ch'eran, sco umens da confidenza (per il solit aderents d'ina partida respectivamain faciun), pli libers en lur votum. La radunanza extraordinaria eleveva senza ses president ed il biro (cumissiun predeliberanta da 52 mess); sias decisziuns eran però, sco usità, sutmessas al referen-



Dretgira nauscha cunter Johann von Planta (1572).

dum. Talas radunanzas vegnivan convocadas en temps inquieti e furmavan savens il rom d'ina dretgira nauscha (per exempel il 1603, 1766 e 1794).

Adolf Collenberg

### Dretgira nauscha

Installada durant il 15avel fin il 18avel tschientaner sco instrument popular e sco dretgira parziala per delicts politics e per tegnair a mastrin l'elita politica e militarada, resortida da la dretgira da reprimanda medievals. La dretgira nauscha vegn menziunada per l'emprima giada explicitamain sco «Strafgericht» en il Kesselbrief dal 1570. Ella sa basava legalmain sin l'emprima lescha da guerra decretada da las Trais Lias il 1486 per punir umens che refusavan il servetsch militar sco era sin la brev da pensiu dal 1500 e sin il Kesselbrief menziunà sura che prevesevan privaziuns rigurusas dals dretgs civils e dal possess en cas d'acceptaziun da pensius estras u d'acquisti d'uffizis a l'intern dal pajais (l'uschenumnà pratitgar, comprar uffizis). Ils Artitgels da Glion dal 1524 stipulavan ina dretgira da cumpromiss imparziala da sis fin nov commembers, instituida al lieu da la Dieta per reglar delicts politics. Delicts commess cunter ina suletta Lia duevan vegnir giuditgads mo da quella. Quai era savens ina dumonda da saun giudizi che provocava gugent dispit, uschia ch'ins recurriva darar a questa disposiziun. En temps inquieti convocav'ins savens dietas generalas u radunanzas extraordinarias. Quellas finivan per regla cun l'installaziun d'ina dretgira nauscha che inquireva al lieu e che pudeva giuditgar e sentenziar senza appellaziun (per exempel quella dal 1794). La partida punida pudeva revocar las sentenzias sulettamain cun instituir da sia vart ina dretgira nauscha, quai ch'è succedì a Tusaun, Cuira e Tavau en ils onns 1618–20. En temps pli vegls vegnivan dentant installadas dretgiras nauschas quasi exclusivamain suenter sollevaziuns. Las diversas tentativas interprendidas tras disposiziuns legalas sco per exempel la lescha cunter il sollevar bandieras, relaschada a la Dieta federala da Glion il 1551, la Brev dals trais sigils dal 1574 u ils Artitgels da las bandieras da Clavenna dal 1586 per impedir las singulas partidas dals fendlis/fenglis da cumin d'installar arbitrariamain dretgiras nauschas e per supprimer l'instigar intenziunà a sollevaziuns han strusch gi in effect. La Refurma dal pajais dal 1603 preveseva per mintga dretgira auta ina dretgira nauscha che consistiva da quatter censurs (agents) e che furmava ina dretgira d'ac-

cusaziun. Ils censurs decidevan sezs u cun agid da giuraders da reprimanda da dretgiras vischinas, sch'ina dretgira nauscha era giavischabla u betg. En cas affirmativ e suenter avair terminà l'inquisiziun vegnivan dumandadas las dretgiras, schebain ins duess avair ina dretgira nauscha u betg. La pratica ha dentant neutralisà era questa tentativa da reformar la justia. La Refurma dal pajais dal 1684 ha scumandà tut las pensius, cun excepziun da quellas cunvegidas contractualmain cun las dretgiras u cun las Lias, ed ha substituì la paina da mort per persunas privatas tras ina multa da 500 curunas. Il Kesselbrief è qua tras vegni abrogà, la Brev dals trais sigils percenter è vegnida reactivada tras in augment dal chasti pronunzià cunter instigatur a sollevaziuns. La dretgira nauscha era bain in instrument legal, ma ella mitschava memia savens da la controlla da las Trais Lias e vegniva de facto utilisada sco instrument d'ina justia parziala da partidas e faciuns. In cas spezial furmava la dretgira nauscha da la cumpagnia da mats.

Adolf Collenberg

## 2. Conflicts e revolts da tempra confessional, politic-economica e culturala

Tals conflicts e talas revolts han provocà en singuls cas acts da violenza, mazaments u blessuras, els na finivan dentant betg cun acziuns despoticas u cun guerras. Exempels èn:

La Revolta dals purs dal 1525 cunter l'uvestg da Cuira e cunter l'avat da Faveras. Encuraschads dals emprims Artitgels da Glion dal 1524, han ils purs refusà da consegnar dieschmas, natiralias e tschains a lur signurs. Ina revolta davant ils mirs da Cuira cun in assagl planisà cunter la sedia episcopala ha chattà la simpatia dals burgais da la citad, l'acziun è dentant ida a fin senza violenza.

L'Affar da Sagogn dal 1693–1742: Il 1693 ha la maiortad catolica da Sagogn exclus ils convischins reformads dal diever communabel da la baselgia, perturbond qua tras la coesistenza paschaivla. Ils catolics han alura era supprimì cun violenza la tentativa dals reformads da constituer in'atgna baselgia. Quai ha provocà tumults ed omaduas gruppas confessionals han mobilisà truppas, provocond agitaziuns en tut il Grischun. Grazia a l'intermediaziun dal chau-lia Adalbert Ludwig de Latour e d'alters umens conciliants han ins cuntanschi ina cunvegna che garantiva als reformads il liber exercizi da lur cult divin e chastiva ils culpants. La pasch definitiva ha pudì ve-

gnir stabilida pir a partir dal 1743, cura ch'ìls protestants han obtegnì lur atgna baselgia.

L'Affar da Tumeagl dal 1766: Sin il chastè dad Ortenstein a Tumeagl residia da temp en temp Johann Victor Travers von Ortenstein, general en l'armada franzosa. Il fatg ch'el n'era betg vegni nominà cumandant dal regiment grischun era tenor el il resultat d'ina intriga da vart da la partida dals Salis. Travers è sa servi da la mastralia da Tumeagl dal 1766 per attargar ils aderents da la partida dals Salis. L'elecziun dal mastral ha provocà ina confruntaziun sanguinosa tranter las trais vischnancas da Veulden, Sched e Tràn e las vischnancas en il fund da la Tumleastga. Il tumult ch'ha chaschunà intginas victimas tranter ils aderents dals Salis è s'extendì sin tut la Tumleastga. Travers ha stuì fugir. Pir la separaziun dal cumin en ina mesa dretgira dad Ortenstein-Mantogna (Im Berg) ed ina mesa dretgira dad Ortenstein-Val (Im Boden) il 1788 ha pussibilità la pasch.

Il cumbat per ils cudeschs da scola en Surselva: Il 1894 ha la Regenza grischuna decretà in nov med d'instrucziun per la segunda classa da la scola primara. Il cudesch cumpigliava tranter auter paraulas, l'istorgia da Robinson e quella dals Nibelungs. En Surselva è sa furmada ina gronda opposiziun cunter la recepziun da quests cuntegns en la translaziun rumantscha. Criticà han ins surtut las «paraulas nunvardaivlas», la tendenza d'ina germanisaziun dal mund rumantsch e la glorificaziun dal mazzament e da la vendetta en ils Nibelungs. Il 1899 ha il pader benedictin Maurus Carnot preschentà sco alternativa al «Robinson» (paganil) ses «Sigisbert en Rezia» (cristian) ch'è daventà immediat in success. Ils 30 da settember 1900 han demonstrà 3000 Sursilvans catolics a Glion en favur dal nov med d'instrucziun. La Regenza grischuna ha sin quai admiss era il «Sigisbert en Rezia» ch'è restà durant l'entir 20avel tschientaner in med d'instrucziun uffizial en las scolas catolicas.

Martin Bindi

Survista da las dretgiras nauschas (glista incompleta)			
Data	Executori/partida pertutgada	Data	Executori/partida pertutgada
1450	LG a Valendau, cunter ia Lia Naira resp. cunter il barun Gieri de Razén, dechantada da Giacun Hasper Muoth en sia ballada renunada «La dretgira nauscha de Valendau» (1882).		
1517–18	LG a Glion, cunter 30 persunas per avair acceptà pensius.		
1526	LDD a Maiavilla, cunter ils anabaptists.		
1529	LCD e dretgiras da la LG, a Cuira, cunter l'avat Theodul Schlegel.		
1542	Dieta extraordinaria a Cuira (avrigli), sin dumonda da las dretgiras engiadinaises cunter 26 umens per avair acceptà pensius da la Frantscha e per avair cumprà uffizis en Vuclina (multas en daners).		
1550	LDD a Tavau, cunter exponents «franzos» per avair fatg alianzas cun la Frantscha ed acceptà pensius franzosas (multas incassadas exclusivamain d'ina dretgira nauscha da las ulteriusas duas Lias).		
1554	LG a Trun, cunter in tscher Vespasian, chapitani da la truppa grischuna en la Battaglia (persa) da Siena.		
1565	Zuoz. Sollevaziun da vart dals aderents engiadinaises da la partida Spagna-Milau (ils Plantas) e dretgira nauscha cunter la partida «franzosa» (ils Salis) ch'ha provocà l'uschen. Guerra da charnpiertg. Las Trais Lias han revocà las sentenzias.		
1572	Trais Lias a Cuira, cunter Johann von Planta ch'è vegni sentenzià a mort tr.a. per avair acceptà privilegias papals.		
1584	Trais Lias a Cuira e Glion, cunter Hieronimo Burgo per avair empruvà da corromper il burgamester da Cuira per in'allianza cun la Spagna/Savoia (Affar Burgo).		
1585	Ina milissa (50 truppas sut la bandiera da divers cumins) èn entradas en Vuclina per impedir l'invasiun tras Tettone. Dretgira nauscha cunter la conspiraziun da Thomas Morone ed auters che vulevan impedir, cun agid da la Spagna, la propagaziun da la Refurma en Vuclina (Affar Morone).		
1603	Trais Lias a Cuira, averta durant la dieta davant la Refurma dal pajais cunter divers uffizians, engaschads en ils onns 1585–1603, per avair cumprà uffizis en Vuclina (multas pauschalas en daner).		
1607	Partida spagnola a Cuira, cunter aderents da la partida franzosa-veneziana: ils sentenziads (tr. a. Johannes Guler) han pudì evitar ils chastis arbitrars, fugind en la Confederaziun. Il medem onn ha ina dretgira nauscha da la partida franzosa sentenzià ed executà a Cuira		
		1608	Trais Lias a Glion, cunter l'uvestg Johann (V) Flugli. Il Congress ha revocà las sentenzias il 1609.
		1616–17	Averta illegalmain a Cuira sin iniziativa dals aderents «franzos» (Rudolf von Planta) cunter ils «venezians» (o. t. ils predigtants).
		1618–20	Partida veneziana (o. t. predigtants) a Tusaun. Averta l'entschatta dals Scumbigls grischuns en consequenza da la sollevaziun da l'Engiadina cunter la partida spagnola. Sentenzias da mort pronunziadas cunter Johann Baptista Prevost (Zambra), Nicolo Rusca, Rudolf e Pompejus von Planta, l'uvestg Johann (V) Flugli e ca. 150 ulteriusas sentenzias. Il 1619 ha il pitag a Cuira revocà las sentenzias da Tusaun, ma la dretgira nauscha da Tavau da la fin da fanadur 1620 ha alura puspè confermà ellas.
		1659	Trais Lias a Tavau. Dretgira nauscha clandestina cunter ils anterius comm. da la Lia da la chadaina, proseguida dal congress/pitag a Glion dapi il schaner 1660 per avair accumulà daners da propaganda e d'agid, concedids da la partida spagnola a las vischnancas tr. il 1637 ed il 1639. Ils sis colonels ed ils trais chaus-lias dal 1637 an vegnids sentenziads a pajaments posterius. La Lia da la chadaina per la liberaziun dal Grischun è dentant vegnida legitimada ex post.
		1684	Trais Lias a Cuira, cunter divers retschaviders da pensius estras.
		1694	Trais Lias a Tusaun, cunter div. chapitanis grischuns (Salis, Travers e. a.) en servetsch franzos.
		1710–11	Congress a Cuira. Dretgira nauscha cunter Thomas Massner, proseguida a Glion.
		1766–67	Partida da Salis a Tumeagl. Dretgira nauscha cunter il general Johann Viktor Travers von Ortenstein (Affar da Tumeagl/Affar Travers).
		1794	Dieta extraordinaria da las Trais Lias a Cuira. Dretgira nauscha sut la direcziun dals Patriots cunter la partida austriaca dals Salis, suandada d'ina refurma dal pajais.
		1798	Trais Lias, sancziunada da las dretgiras per eruir e punir ils «culpants» da la perdita da la Vuclina (o. t. ils Salis).

Cumpilaziun Adolf Collenberg

Dretgiras nauschas dal temp da las Trais Lias (15avel–18avel tschientaner).

## Lexicon Istoric Retic

Il LIR cumpiglia bundant 3100 artigels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.